



তুরস্কের সিন্দিরগিতে ৬.১ মাত্রার ভূমিকম্পে নারী নিহত, ধসে পড়েছে বহু ভবন



সংগৃহীত ছবি

তুরস্কের পশ্চিমাঞ্চলীয় বালিকেসির প্রদেশের সিন্দিরগি জেলায় রবিবার (১০ আগস্ট) সন্ধ্যায় শক্তিশালী ৬.১ মাত্রার ভূমিকম্প আঘাত হেনেছে। স্থানীয় সময় রাত ৭টা ৫৩ মিনিটে (১৯:৫৩ TRT) সংঘটিত এই ভূমিকম্পে অন্তত একজন নিহত এবং ২৯ জন আহত হয়েছেন। ধসে পড়েছে ১৬টি ভবন ও দুটি মসজিদের মিনার।

তুরস্কের দুর্যোগ ব্যবস্থাপনা কর্তৃপক্ষ (AFAD) জানায়, ভূমিকম্পটির উৎপত্তিস্থল ছিল প্রায় ১০ থেকে ১১ কিলোমিটার গভীরে, যা তুলনামূলকভাবে অগভীর হওয়ায় ক্ষয়ক্ষতি বেশি হয়েছে। নিহত নারী (বয়স প্রায় ৮১-৮২) ধ্বংসস্তূপ থেকে জীবিত উদ্ধার হওয়ার পর চিকিৎসাধীন অবস্থায় মারা যান। আহতদের কারো অবস্থা আশঙ্কাজনক নয় বলে কর্তৃপক্ষ জানিয়েছে।

প্রত্যক্ষদর্শীরা জানান, হঠাৎ প্রবল ঝাঁকুনিতে মানুষ ঘরবাড়ি ছেড়ে রাস্তায় বেরিয়ে আসে। ভূমিকম্পের প্রভাব প্রায় ২০০ কিলোমিটার দূরের ইস্তানবুল এবং ইজমির শহরেও অনুভূত হয়েছে। স্থানীয় বাসিন্দাদের মধ্যে আতঙ্ক ছড়িয়ে পড়ে।

ভূমিকম্পের পর একাধিক আফটারশক আঘাত হানে, যার মধ্যে একটি ছিল ৪.৬ মাত্রার। ক্ষতিগ্রস্ত ভবনগুলোতে প্রবেশ না করতে বাসিন্দাদের সতর্ক করেছে কর্তৃপক্ষ। উদ্ধার ও তল্লাশি অভিযান এখনও চলছে।

তুরস্ক ভূমিকম্পপ্রবণ দেশগুলোর একটি, যা উত্তর আনাতোলিয়ান ফল্ট জোনের মতো সক্রিয় ভূ-ভাগের ওপর অবস্থিত। গত এপ্রিলেও মারমারা সাগর অঞ্চলে ৬.২ মাত্রার ভূমিকম্পে প্রাণহানি ও ব্যাপক ক্ষয়ক্ষতি হয়েছিল।